



Situaziun da partenza

La scola porscha allas scholaras ed als scolars* dalla 1. e 2 superioriura a Danis la pusseivladad da luvrar cun iPads. Quels apparats duein vegnir duvrai per differents aspects d'emprender. Il present contract duei reglar il diever dils apparats ed igl access als mieds electronics ed internet sco era il diever da tals. Il reglament vala da tut temps, ton per il diever en scola sco a casa.

* (sequent vegn ord motivs pratics duvrau per scholaras e scolars la fuorma masculina)

Diever dils apparats Apple iPad 9.7" (2018) 128 GB

Art. 1 Possess e diever

Ils iPads ein possess dalla scola. Els vegnan registrai e marcai da quella. Mintga scolar re-
tscheiva in iPad marcaus individualmein. Las datas ch'ei arcunadas sil sistem restan possess
dalla scola. Ellas vegnan controlladas e survegladas regularmein.

Scolars han absolutamein negin dretg da sfera privata cul diever digl iPad.

Art. 2 Pensums dalla scola

Ils iPads vegnan administrai, configurai e surveglai dalla scola. Plinavon porscha la scola ils
updates necessaris ed ei responsabla per la segirtad dallas datas.

Art. 3 Diever digl apparat (hardware)

Ils scolars drovan ils iPads per l'instrucziun. Igl ei scumandau da:

- far midadas vid la hardware,
- metter taccaders ni decoraziuns vid igl apparat,
- brattar igl iPad cun auters conscolars,
- dismetter ni vender igl iPad.

Art. 4 Diever digl apparat (software)

Suandontas funcziuns / acziuns ein scumandadas:

- aschuntar, eliminar ni deactivar applicaziuns,
- crear in conto dad Apple Music ni Apple TV,
- midadas da configuraziuns (inclusiv dalla reit),
- sincronisar igl apparat cun in computer ordeifer la scola,
- stizzar il decuors dil browser (app Safari ni Firefox-> internet),
- midar ni deactivar plaids-clav

Art. 5 Donns

5.1 Suandonts donns vegnan surpri dalla scola:

- donns da garanzia,
- donns caschunai senza cuolpa ni entras accident.

5.2 Suandonts donns vegnan surpri dils scolars respectivamein da lur geniturs:

- donns caschunai per atgna cuolpa,
- donns caschunai per malprecauziun.

5.³ La summa dil donn vegn mintgamai fixada dalla firma che procura il support.

Art. 6 Enguladetsch

Sch'in apparat svanescha ei quei dad annunziar immediatamein alla scola. Lezza interpren ils pass necessaris. Las circumstanzas dalla situaziun vegnan intercuretgas individualmein. Ei igl apparat svanius ni vegnius engulaus muort malprecauziun, stat il scolar buns pil donn.

Il rapport da polizia ei la premissa per che la scola remplazzi igl apparat gratuitamein.

Art. 7 Diever a casa

Il diever digl iPad a casa ei dependents dils suandonts facturs:

- ils geniturs han priu enconuschientscha dil reglament e lubeschan a lur affon dad era far diever a casa da quei apparat,
- il scolar ha la lubientscha dalla scola da prender igl apparat a casa.

Il diever digl iPad a casa ei gratuits. Al scolar vegn plinavon mess a disposiziun gratuitamein ina scatola/tastga da protecciun (cun integrau ina tastatura) ed in rispli digital.

Art. 8 Premissas pil diever digl iPad a casa

8.¹ Ils geniturs:

- portan la responsabladad pil diever digl iPad a casa,
- ein responsabels che lur affons semovien a moda segira egl internet,
- han il dretg da mirar ni stizzar ils cuntegns,
- limiteschan il diever digl iPad el temps liber,
- ein responsabels per tut ils donns caschunai vid ils apparats a casa,
- ein responsabels per la filtraziun dil cuntegn ni limitaziuns da temps sill'atgna reit,
- ein responsabels sch'igl apparat svanescha ni vegn engulaus.

8.² Ils scolars:

- prendan adina igl iPad cun els a scola (cargaus sufficientamein)
- astgan duvrar igl apparat cun outras colligiaziuns da WLAN; la scola porscha denton leutier negin sustegn tecnic
- tractan hardware e software cun tut quitau.

8.³ La scola:

- segida ed eliminescha eventuels problems. Mintga incap vegn protocollaus; drova in scolar pliras gadas quei sustegn, astga el buca pli prender igl iPad a casa.
- ha negina segirada pil diever pils iPads ordeifer il temps da scola. Donns cun consequenzas finanzialas van a donn e cuost dil scolar, respectivamein dils geniturs. (Mira artechels 5 e 6!)

Diever digl internet

Nus essan dil meini ch'igl internet seigi ina resursa nizeivla e che la scola e scolars duegien luvrar cun quei mied a moda positiva. Nus essan pertscharts dils prighels ch'il diever digl internet includa, denton ein ils avantatgs per la scolaziun aschi pesonts che l'utilisaziun digl internet duei era formar ina part dall'instrucziun.

Nus savein ch'ei dat buc ina sempla sliigiaziun tecnica che garantescha ch'ils affons lavuran online a moda segira. Il dretg secuntener sto vegnir emprius ed exercitaus sut survigilanza. La

scola e las personas d'instrucziun ein pertscharts dalla responsablidad ch'igl access agl internet porta e sorprendan quella cun ina survegionza adequata.

Grondas instituziuns da scolaziun han fatg l'experienza ch'il diever memia restrictiv pertuc-cont filtraziuns d'internet tier affons e giuvenils fa buca pli segira la situaziun, damai ch'ella pren naven la responsablidad ch'ils affons ston emprender cul diever da novas tecnologias. Perquei integrein nus l'utilisaziun da novas medias en nies mintgadi, setenend denton vid reglas claras e fermas. A quellas appartegnan:

- ina tenuta clara e transparenta ed in diever acceptabel che vegnan defini en in contract, il qual vegn suttascrets da geniturs e scolars,
- diever survegilaun,
- mesiras da protecziun tecnicas (p.ex. filter da cuntegns dubius),
- consequenzas disciplinaras en cass da surpassaments enviars il contract.

Nus lein tuts (persunas d'instrucziun, responsabel per ICT, menader da scola, scolars) far tut il pusseivel per garantir in diever digl internet aschi segir sco pusseivel.

Art. 9 Access alla reit

Scolars astgan duvrar en scola mo la reit ufficiala da WLAN dalla scola. Access alternativs (via telefonins ni autras reits) san buca vegnir controllai ed ein perquei scumandai.

Art. 10 Reglas pil diever dalla reit

Per tut ils utilisaders dalla reit dalla scola vala:

- adressas dad e-mail duein ins dar mo a personas da confidanza,
- mintga adressa dad e-mail dad ina fontauna nunenconuschenta sto vegnir annunziada,
- vegnan cuntegns zuppai, obscens, permalonts ni schiglioc cuntegns inacceptabels scuvretgs, ston quels immediatamein vegnir comunicai al responsabel per ICT,
- adressas ni numras da telefon audan buc ella reit, ni las atgnas, ni da conscolars ni da personas d'instrucziun,
- vegnan fotografias ni videos cargai silla reit, astgan ils scolars buca esser numnai cugl entir num ed aschia restar anonims schi lunsch sco pusseivel,
- mintga access vegn survegilaun: datas, decuors dil browser (Safari, Firefox) ein accessibels da tut temps alla scola ed astgan buca vegnir stizzai.

Art. 11 Diever acceptau e lubiu

Ils scolars san duvrar la reit dalla scola per intents pedagogics. Quels ein defini suandontamein:

- instrucziun,
- retschercas,
- formaziun cuntinuada el sectur scolaziun,
- administraziun.

Tut las lavurs che stattan en connex cun emprender, derasar savida ed augmentar las atgnas cumpetenzas ein giavischadas e lubidas.

Art. 12 Diever scumandau

Igl ei scumandau strictamein da:

- dar vinavon ni modificar plaids-clav,
- crear e derasar maletgs e datas cun cuntegn permalont, obscen e scandalus,
- crear e dar vinavon material cull'intenziun da derasar tema ni currellas,
- crear e derasar material cugl intent da cuglienar,
- crear e derasar material che sa far donn a persunas,
- adattar e derasar material ch'ei schurmegiaus entras dretg d'autur (copyright),
- crear e dar vinavon material da marketing ni da massas per utilisaders ordeifer la scola (spam),
- dar access a persunas buc autorisadas sin installaziuns ni purschidas (hackers).

Medemamein ein activitads specificas che han cun gronda probabladad las suandontas consequenzas scumandadas:

- sfarlatar resursas dalla reit e temps da lavur da persunas d'instrucziun ni d'emploiai pigl internet,
- donnegiar e demolir datas dad auters utilisaders,
- violar la sfera privata dad auters utilisaders,
- disturbar la lavur dad auters utilisaders,
- bloccar il survetsch per auters utilisaders (p.ex. cun surcargar igl access senza risguard -> sitecrashing),
- diever da software e hardware che ha procurau per disturbis ed ei perquei sclaus dalla scola,
- maldiever dalla reit da scola ni resursas da quella entras derasaziun da virus e malware,
- diever dalla reit da scola per donnegiar e devastar autras reits.

Art. 13 Activitads sut survegionza

Suandontas applicaziuns (apps) ed activitads astgan vegnir exequidas mo sut survegionza e cun lubientscha dalla persona d'instrucziun:

- programs da chat (p.ex. "Nachrichten/iMessage", "FaceTime" etc.) e newsgroups per in pensum specific,
- la persona d'instrucziun sa era scumandar da scargar cert material,
- la persona d'instrucziun ei responsabla ch'il material cunterfetschi buc al dretg d'autur,

Agens downloads da scolars ein scumandai.

Art. 14 Segirtad en la reit

Per francar ch'ils scolars semovien en parts adequatas digl internet e ch'els seigien buca exponi al prighel da cyber

- san las persunas d'instrucziun far emprovas e controllar da tut temps il decuors dil browser e dil cuntegn dils iPads,
- astga il decuors dil browser mai vegnir stizzaus,
- suttascrivan ils geniturs in contract davart il diever acceptabel dils iPads.

Art. 15 Diever da cameras

Il diever da cameras ha liug mo cun lubientscha e sut survegionza dalla persona d'instrucziun. Igl ei scumandau strictamein da fotografar ni filmar conscolars en zulers e sin plaz scola e cargar il material silla reit.

Art. 16 Consequenzas disciplinaras

Surpassaments encunter ils artechels numnai en quei reglament vegnan castigai rigurusamein tenor il management da conflicts dalla scola.

Ultra da quei san las consequenzas disciplinaras includer ils suandonts pass:

- scamond da duvrar igl iPad ordeifer la scola,
- restricziuns da duvrar igl iPad en scola,
- scamond da luvrar cun igl iPad,
- negin access agl internet,
- grevs surpassaments tenor artechels 10 e 12 san vegnir annunziai alla polizia.

Art. 17 Vigur

Quei reglament entra en vigur cun l'entschatta digl onn da scola 2019/2020.

Approbau dil cussegl da scola en seduta dils 16 da settember 2014, adattau sin entschatta digl onn da scola 2019/20.

Danis/Breil, ils 30 d'uost 2019

Il president



Sievi Sgier

Il menader da scola



Francestg Friberg
